



Broj/Број: 01/2a-50-1-2-14/07  
Sarajevo/Сарајево, 12.10. 2007.

## **ZAPISNIK**

### **14. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 10.10. 2007. godine**

Sjednica je počela u 12 sati i vodio ju je predsjednik Komisije Slavko Matić. Sjednici su prisustvovali sljedeći članovi Komisije: Slavko Matić, Denis Bećirović, Husein Nanić, Azra Alajbegović, Sadik Ahmetović, te Davorin Semenik –privremeni sekretar Komisije.

Odsutni su bili: Milorad Živković, Milica Marković dok su svoje odsustvo sa sjednice najavili Sefer Halilović i Azra Hadžiahmetović.

Sjednici su prisustvovali i izvjestioci: Radomir Bogdanović ispred Ministarstva vanjskih poslova BiH, Šećerović Rasim i Karahodžić Damir ispred Ministarstva vanjske trgovine i ekonomskih odnosa BiH.

Zapisnik su vodili studenti - stažisti Mirjana Brčkalo i Lejla Isović.

Potom je predsjednik Komisije predložio sljedeći

## **D NE V N I R E D**

- 1) Verificiranje Zapisnika 11. sjednice održane 30.07.2007. godine, 12. sjednice održane 04.09.2007. godine i 13. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 26.09.2007. godine;
- 2) Davanje suglasnosti za ratificiranje Konvencije Vijeća Evrope o pranju novca, otkrivanju, privremenom oduzimanju i konfisciranju dobiti stečene kriminalnim radnjama i o financiranju terorizma, Varšava, 16.maja.2005. godine (Predlagatelj: Ministarstvo vanjskih poslova BiH);
- 3) Davanje suglasnosti za ratificiranje Konvencije Vijeća Evrope o borbi protiv trgovine ljudima (Predlagatelj: Ministarstvo vanjskih poslova BiH);
- 4) Davanje suglasnosti za ratificiranje Konvencije Vijeća Evrope o sprečavanju terorizma, Varšava, 16.maja. 2005. godine (Predlagatelj: Ministarstvo vanjskih poslova BiH);
- 5) Davanje suglasnosti za ratificiranje Sporazuma o ekonomskoj i tehnološkoj suradnji između Vijeća ministara BiH i Vlade Republike Grčke (Predlagatelj: Ministarstvo vanjske trgovine i ekonomskih odnosa BiH);
- 6) Davanje suglasnosti za ratificiranje Sporazuma između Bosne i Hercegovine i Islamske Republike Pakistan o suradnji u oblasti odbrambene industrije (Predlagatelj: Ministarstvo vanjske trgovine i ekonomskih odnosa BiH);
- 7) Zabilješka sa sastanka između Ane Trišić - Babić, zamjenice ministra vanjskih poslova BiH sa pomoćnikom ministra vanjskih poslova Narodne Republike Kine g. Kong Quan-om održanog 04.09.2007. u Sarajevu povodom održavanja konsultacija dva ministarstva vanjskih poslova;

- 8) Pismo Ane Trišić – Babić, zamjenice ministra vanjskih poslova BiH, od 18.09.2007. upućeno Predsjedavajućem Vijeća ministara BiH, g. Špiriću povodom problema u funkcioniranju Ministarstva vanjskih poslova BiH;
- 9) Zabilješka sa zajedničkog sastanka Komisije za vanjske poslove Zastupničkog doma Parlamentarne skupštine BiH i Komisije za vanjsku i trgovinsku politiku, carine, promet i veze Doma naroda Parlamentarne skupštine BiH sa predstavnicima Ministarstva vanjskih poslova BiH i g. Branimirom Jukićem, novoimenovanim ambasadorom BiH u Crnoj Gori;
- 10) Zabilješka sa sastanka između Komisije za vanjske poslove i ambasadorice Hane Hubačkove, Direktorice Evropskog teritorijalnog odjela u Ministarstvu vanjskih poslova Češke Republike, održanom 12.09.2007. godine;
- 11) Tekuća pitanja.

Predloženi dnevni red je jednoglasno usvojen.

**Ad.-1. Verificiranje Zapisnika 11. sjednice održane 30.07.2007. godine, 12. sjednice održane 04.09.2007. godine i 13. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 26.09.2007. godine;**

Predsjednik Komisije, g. Matić je prije verifikacije zapisnika sa prethodne tri sjednice Komisije, zamolio prisutne članove da se izjasne o zapisnicima i iznesu svoje primjedbe ukoliko ih imaju. Denis Bećirović i Husein Nanić su iznijeli svoje primjedbe na Zapisnik 11. sjednice Komisije, jer u njemu nije naznačeno da su pomenuti članovi blagovremeno najavili svoje opravdano odsustvo sa te sjednice Komisije. Ostali članovi Komisije nisu imali primjedbe na zapisnike. Zapisnici sa prethodne tri sjednice su potom jednoglasno verifikovani.

**Ad.-2. Davanje suglasnosti za ratificiranje Konvencije Vijeća Evrope o pranju novca, otkrivanju, privremenom oduzimanju i konfisciranju dobiti stečene kriminalnim radnjama i o financiranju terorizma, Varšava, 16. maja 2005. godine (Predlagatelj: Ministarstvo vanjskih poslova BiH);**

Prije razmatranja ove Konvencije, predsjednik Matić je od g. Bogdanovića zatražio pojašnjenje u vezi sa Evropskom poveljom o regionalnim ili manjinskim jezicima čije usvajanje je jedna od postprijemnih obaveza BiH u Vijeću Evrope jer je ova povelja povučena iz parlamentarne procedure na zahtjev Ministarstva za ljudska prava i izbjeglice BiH. G. Bogdanović je pojasnio da se radi o Konvenciji o zaštiti prava manjina i da je razlog povlačenja povelje taj što broj članova povelje na koje naša strana nije stavila rezerve nije bio dovoljan, tj. nije zadovoljavao zahtjeve Evropske konvencije. Ministarstvo ljudskih prava i izbjeglica BiH nije usaglasilo postojeće niti dodalo nove članove koji se traže tom Konvencijom, stoga je povelja vraćena u Ministarstvo ljudskih prava i izbjeglica BiH na doradu. Ovo ministarstvo još nije dostavilo dopunjenu verziju povelje i tek kada to uradi, tada će povelja biti vraćena u parlamentarnu proceduru.

Potom je g. Bogdanović govorio o Konvenciji Vijeća Evrope o pranju novca, otkrivanju, privremenom oduzimanju i konfisciranju dobiti stečene kriminalnim radnjama i o financiranju terorizma. Predložio je prisutnim članovima da daju suglasnost kako bi se Konvencija ratifikovala jer je provedena kompletna procedura.

Predsjednik Matić je stavio na glasanje ovu tačku dnevnog reda i data je jednoglasna suglasnost za ratificiranje ove konvencije.

**Ad.-3. Davanje suglasnosti za ratificiranje Konvencije Vijeća Evrope o borbi protiv trgovine ljudima (Predlagatelj: Ministarstvo vanjskih poslova BiH);**

I po ovoj tački dnevnog reda izlagao je g. Radimir Bogdanović. On je podsjetio da je ovo jedna od Konvencija čije potpisivanje je obaveza BiH na putu ka stabilizaciji i pridruživanju EU. Predsjedništvo BiH je još 2005. godine donijelo odluku o pristupanju ovoj Konvenciji. U avgustu 2007. godine i Vijeće ministara BiH je donijelo Prijedlog odluke o pristupanju i uputilo ga Predsjedništvu BiH na ratifikaciju. Provedena je sva neophodna procedura po zakonu i postulatima međunarodnih ugovora, pa je g. Bogdanović predložio da se da suglasnot za ratificiranje. Predsjednik Matić je otvorio raspravu po ovoj tački dnevnog reda. Pošto nije bilo pitanja za g. Bogdanovića pristupilo se glasanju. Svi članovi Komisije su bili za davanje ove suglasnoti.

**Ad.-4. Davanje suglasnosti za ratificiranje Konvencije Vijeća Evrope o sprečavanju terorizma, Varšava, 16.maja. 2005. godine (Predlagatelj: Ministarstvo vanjskih poslova BiH);**

I ova Konvencija je, po riječima g. Bogdanovića, još jedna u nizu koju je BiH obavezna potpisati. Predsjedništvo BiH je donijelo odluku o pristupanju ovoj Konvenciji, a zatim je Vijeće ministara BiH donijelo Prijedlog odluke o pristupanju i uputilo ga Predsjedništvu BiH na ratifikaciju. G. Matić je predložio davanje suglasnosti i svi članovi su glasali za. Nakon davanja suglasnosti za ratifikaciju ovih konvencija, g Matić je izrazio zadovoljstvo što nadležne institucije BiH kreću dinamičnije u potpisivanju konvencija koje su dio postprijemnih obaveza BiH u Vijeću Evrope. Naveo je da je sve kraće vrijeme koje prođe od ratifikacije konvencija u Predsjedništvu BiH pa do davanja suglasnosti Komisije, najbolji pokazatelj da su institucije BiH ažurnije.

**Ad.-5. Davanje suglasnosti za ratificiranje Sporazuma o ekonomskoj i tehnološkoj suradnji između Vijeća ministara BiH i Vlade Republike Grčke (Predlagatelj: Ministarstvo vanjske trgovine i ekonomskih odnosa BiH);**

G. Matić je dao riječ izvjestiocu, g. Šećerović Rasimu iz Ministarstva vanjske trgovine i ekonomskih odnosa BiH. G. Šećerović je istakao da je ovo uobičajeni ugovor, potpisan sa prijateljskom zemljom i da se specifičnost ovog ugovora ogleda u dogovorenoj tehnološkoj suradnji. Dodao je i to da je sklapanje ovog sporazuma bilo predviđeno za prošlu godinu i da je davanje suglasnosti završni dio ratifikacije. G. Šećerović predložio je davanje suglasnosti za ratifikaciju Sporazuma. G. Matić je zamolio prisutne članove da se izjasne po ovoj tački, a nakon izjašnjavanja konstatirao da je Komisija jednoglasno dala suglasnot za ratifikaciju.

**Ad.-6. Davanje suglasnosti za ratificiranje Sporazuma između Bosne i Hercegovine i Islamske Republike Pakistan o suradnji u oblasti odbrambene industrije (Predlagatelj: Ministarstvo vanjske trgovine i ekonomskih odnosa BiH);**

G. Matić je dao riječ izvjestiocu iz Ministarstva vanjske trgovine i ekonomskih odnosa BiH, Damiru Karahodžiću. G. Karahodžić je rekao da je inicijator sklapanja ovog sporazuma pakistanska strana koja je i iznijela svoj prijedlog g. Nikoli Radovanoviću, tadašnjem ministru odbrane, prilikom njegove posjete Pakistanu. Saradnja u oblasti odbrambene industrije je veoma značajna za BiH jer je Pakistan jedna od vodećih sila kao potrošač vojne opreme. U okviru realizacije ovog Sporazuma biće oformljen i Zajednički odbor koji će sačinjavati predstavnici obje ugovorne strane. Ovaj Sporazum ne isključuje bilateralnu saradnju između bh i pakistanskih fabrika koje su postojale i prije sklapanja ovog Sporazuma, a on će dodatno olakšati izlazak BiH na to tržište. Sporazum je potpisan u skladu sa zakonskom procedurom prilikom posjete predsjednika Pakistana Perveza Mušarafa Bosni i Hercegovini. G. Matić je otvorio raspravu i pitao izvjestioca o kojim konkretno proizvodima je riječ, odnosno šta će

tačno razmjenjivati BiH i Pakistan. G. Karahodžić je odgovorio da će bosanska strana izvoziti motore za tenkove koji će se proizvoditi u Fabrici specijalne namjene FAMOS na Palama kao i artiljerijsku municiju koja će se proizvoditi u fabrici Pretis u Vogošći. Potom je g. Matić ovu tačku stavio na glasanje, i svi članovi Komisije su bili za davanje suglasnosti.

**Ad.-7. Zabilješka sa sastanka između Ane Trišić - Babić, zamjenice ministra vanjskih poslova BiH sa pomoćnikom ministra vanjskih poslova Narodne Republike Kine g. Kong Quan-om održanog 04.09.2007. u Sarajevu povodom održavanja konsultacija dva ministarstva vanjskih poslova;**  
Informacija je primljena k znanju bez rasprave.

**Ad.-8. Pismo Ane Trišić – Babić, zamjenice ministra vanjskih poslova BiH, od 18.09.2007. upućeno Predsjedatelju Vijeća ministara BiH, g. Špiriću povodom problema u funkcioniranju Ministarstva vanjskih poslova BiH;**

Za riječ se javio g. Husein Nanić koji je istakao da postoje neke stvari koje ukazuju da postoje problemi u radu i odnosima unutar Ministarstva vanjskih poslova BiH te da ima informacije da su određeni sporazumi sa Slovenijom u zastoju, a razlog tome nije Vlada Slovenije i da je u tom slučaju evidentno da Ministarstvo vanjskih poslova BiH nije odradilo svoj dio posla. Zatim se za riječ javila gđa Azra Alajbegović koja je tom prilikom iznijela svoj prijedlog da se ispred Komisije uputi dopis Ministarstvu vanjskih poslova BiH kojom će se zatražiti izjašnjenje ministra Alkalaja o pomenutim problemima. Gđa Alajbegović smatra da na ovo pismo gđe Ane Trišić- Babić Komisija ne bi smjela ostati bez odgovora, ali da isto tako ne bi smjela unaprijed donositi osude dok se ne čuje i druga strana tj. ministar vanjskih poslova BiH.

G. Denis Bećirović je podsjetio da je na narednoj sjednici ZD PS BiH jedna od tačaka dnevnog reda i Inicijativa Kluba poslanika SDP-a u ZD PS BiH za smjenu ministra Svena Alkalaja. G. Matić se složio sa prijedlogom gđe Alajbegović o upućivanju dopisa Ministarstvu kojom će ujedno obavjestiti ministra Alkalaja o pismu njegove zamjenice, a kopija ovog pisma će biti priložena uz dopis. Također će se od ministra zatražiti njegovo očitovanje prilikom rasprave o inicijativi za smjenu.

**Ad.-9. Zabilješka sa zajedničkog sastanka Komisije za vanjske poslove Zastupničkog doma Parlamentarne skupštine BiH i Komisije za vanjsku i trgovinsku politiku, carine, promet i veze Doma naroda Parlamentarne skupštine BiH sa predstavnicima Ministarstva vanjskih poslova BiH i g. Branimirom Jukićem, novoimenovanim ambasadorom BiH u Crnoj Gori;**  
Informacija je primljena k znanju bez rasprave.

**Ad.-10. Zabilješka sa sastanka između Komisije za vanjske poslove i ambasadorice Hane Hubačkove, Direktorice Evropskog teritorijalnog odjela u Ministarstvu vanjskih poslova Češke Republike, 12.09.2007. godine;**  
Informacija je primljena k znanju bez rasprave.

**Ad.-11. Tekuća pitanja;**

**1. Posjeta Komisije za vanjske poslove ZD PS BiH Ruskoj Federaciji;**

Privremeni sekretar Komisije g. Davorin Semenik je prisutne članove Komisije informirao o pripremama za posjetu Komisije za vanjske poslove Ruskoj Federaciji. U tom kontekstu naglasio je da su svi tehnički detalji odrađeni kao i da su pripremljeni svi potrebni materijali.

## **2. Inicijativa zastupnika PS BiH g. Jerke Ivankovića Lijanovića o otvaranju ambasade BiH u Albaniji;**

G. Semenik je, kao još jedno od tekućih pitanja, pomenuo inicijativu poslanika ZD PS BiH Jerka Ivankovića Lijanovića o otvaranju ambasade BiH u Albaniji. Inicijativa je dostavljena Komisiji kao nadležnoj za ovo pitanje. Kako bi se Komisija mogla odrediti prema inicijativi, odlučeno je da se ona dostavi Predsjedništvu BiH i Ministarstvu vanjskih poslova BiH za mišljenje.

## **3. Grupe prijateljstva;**

G. Semenik je predložio da se uputi zahtjev Kolegiju ZD PS BiH da utvrdi formulu za formiranje grupe prijateljstva, a prema odluci koja ova pitanja regulira.

## **4. Program podrške OSCE-a PS BiH;**

Ispred misije OSCE-a u BiH sjednici Komisije prisustvovala je i gđica Nina Šandrk koja je obavijestila prisutne da će OSCE BiH potvrdno odgovoriti na dopis Komisije kojim se traži pomoć OSCE-a u vidu kupovine laptop računara članovima ove Komisije. U sklopu tog programa podrške OSCE BiH će organizovati i obuku za rad na računarima onih članova koji su zainteresovani i kojima je to neophodno. Kako bi se odredio broj članova koji će pristupiti obuci gđica Šandrk je članovima Komisije podijelila ankete o poznavanju rada na računaru. G. Matić je sugerisao gđici Šandrk da ukoliko u dotičnoj Komisiji ne bude dovoljan broj zainteresovanih za obuku, ovaj poziv uputi i drugim komisijama PS BiH.

Sjednica je završila svoj rad u 13 sati.

PRIVREMENI SEKRETAR  
KOMISIJE ZA VANJSKE POSLOVE  
**Davorin Semenik**

PREDSJEDNIK  
KOMISIJE ZA VANJSKE POSLOVE  
**Slavko Matić**

Kopija: MVP-u BiH